



## Notat

Dato: 07.11.2018  
Arkivsak: 2016/943-47  
Saksbehandlar: hanengu

---

<b>Til:</b>	Fylkesutvalet
<b>Frå:</b>	Fylkesrådmannen

---

### Svar på spørsmål om interkommunal planlegging

Fylkesrådmannen viser til spørsmål frå representanten Benthe Bondhus: «*Interkommunal Planprosess (mellom kommunar der fylkeskommunen er involvert). Kan Hordaland Fylkeskommune overta prosessen?*»

Eit interkommunalt planarbeid er eit samarbeid om planlegging etter plan- og bygningslova mellom to eller fleire kommunar. Prosesser med interkommunal planlegging er regulert gjennom plan- og bygningslova kapittel 9. Slikt samarbeid kan omfatte alle kommunale plantypar, både kommunedelplan og reguleringsplanar. Fylkesrådmannen gjer i dette notatet greie for korleis ein slik prosess kan bli ført vidare i regi av regional planmyndigheit (fylkeskommunen).

Plan- og bygningslova § 9-1 slår i annet ledd fast at «*Regional planmyndighet eller statlige myndigheter kan anmode kommunene om å innlede et slikt samarbeid (interkommunalt planarbeid) når det anses nødvendig for å ivareta hensyn og løse oppgaver som går ut over den enkelte kommune*». Regional planmyndigheit kan likevel ikkje pålegge kommunane eit slikt arbeid, det er det berre departementet som har moglegheit til, jf. tredje ledd i same paragraf.

Ein interkommunal plan kan også bli vidareført som regional plan i regi av regional planmyndigheit. Dette er regulert gjennom § 9-4 i pbl. Lovteksten opnar for at kommunane kan anmode fylkeskommunen om å ta over arbeidet som regional plan, eller at regional planmyndigheit anmoder kommunane om at planarbeidet kan bli ført vidare som regional plan. Igjen er det berre departementet som kan pålegge at dette skjer.

#### Regional plan

Regional planstrategi er ein obligatorisk plan heima i plan- og bygningslova § 7-1 og skal bli vedteken av fylkestinget kvart fjerde år. Planstrategien fastset kva planar som skal gjelda i perioden og kva planar som skal utarbeidast eller reviderast. Planstrategien kan reviderast i planperioden dersom det er trong for det, men skal som hovudregel gjelda for heile perioden. Fylkestinget kan vedta å starte eit nytt regionalt planarbeid som ikkje er i samsvar med planstrategien.

Regional plan kan ikkje bli utarbeidd som kommunale plantypar, og kan dermed ikkje heimle utbygging direkte. Etter § 8-5 i pbl kan ein fastsetje regional planføresegn knytt til retningsliner for arealbruk. Ein regional planføresegn har som verknad at det ikkje kan bli satt i gang særskilt gitte bygge- eller anleggstiltak innanfor nærare avgrensa geografiske område. For å gjennomføre utbygging i slike område krevst det samtykke frå fylkeskommunen. Dette kan til dømes bli brukt for å sikre areal til framtidig samferdselsinfrastruktur som enno ikkje er fastsett i kommunale planar.